

Erich Bolinius  
[www.erichbolinius.de](http://www.erichbolinius.de)

**(Bericht über den BSV Kickers Emden**

Sendung „Flutlicht“ auf Radio Ostfriesland

**Donnerstag, 23.1.2014 18.00 Uhr** auf 94.0 bzw. 87,7)

Moin, leev Toehörers,  
de Winter hett uns upstünns hart in d' Greep. Foetballspölen hett dat buten in de lesd Week neet geven. Man traineert word ok bi Kickers Emden buten! Dat hett man mi vertellt. Ik sülvst hebb an Dingsdag bi hoog Schnee un unner Floetlücht mit mien Petjemer Ü60-Mannskupp traineert. Wi wassen 16 Spölers.  
Ok Nils Andersson van Kickers Oll Heeren vertellte mi, dat se nu ok bi Wind un Weer traineren denen. Se wassen lesd Maal over twintig Mann up de Platz west. Ja, man kann seggen, je oller, umso doller.  
Un nu giff dat för de Ü60-Mannskuppen in Neddersassen ok noch 'n Neddersassenmeisterskupp. De word an 19. Juli in Grootfehn unner 21 Mannskuppen utdragen. Ut Emden sünd de Mannskuppen van RSV, Larrelt/Twixlum/Wybelsum un Petkum dorbi. Worum Amisia/Kickers Emden sük bi disse Spöleree um de Neddersassenmeisterskupp neet meldt hett, verstah ik neet. Aber dat kann man villicht ja noch nahalen.

In de Halle spölen besünners de Joegdmanskuppen. Dorbi wunnen de Jungs van Kickers Emden bi de Sparkassen-Cup all veer Turneren.  
De U15 van Kickers, de as Kickers 1 spölte, deklasserte in dat eerst Spöl de U14 van Kickers. Nadem man ok dat tweed Spöl tegen de JFV Krummhörn wunnen harr, gung dat dann tegen Titelverteidiger Nörden. Man ok hier wunnen de Jungs van Kickers 1 dat Spöl. In dat Halvfinale wurr Larrelt mit 3:1 in Elfmetersketen slaan. Dat Endspöl tegen TuS Pesem wunn Kickers vör de Ogen van Emdens Oberbörgmester Bernd Bornemann, de keen Foetballspöler sünnern Badmintonspöler is, mit 2:0.

Bi de D-Jugend Turnier van de VGH-Pokal wunnen de D1 Junioren van Kickers Emden ok tegen de TuS Pesem (Pewsum). In de Spölen van de acht Mannskuppen moken de Talente Tobias Bruns van Kickers Emden un Philipp Pupkes van TuS Pesem up sük upmerksaam. Hopenlik warben de grotere, hogere spölenden Vereenen de beid Spöler neet al in jung Jahren of.

Nu toe de oll fröhre Kickersspöler Jörg Müller.  
He wesselte 1990 toesamen mit Jörg Heinrich un Detlef Uecker van Chemie Velten na Kickers Emden. He spölte bi Kickers bold acht Jahr in 't Middelfeld of later ok as Libero. Dorna gung he na Wilhelmshaven, Ihrhove, Pesem, Nörden un Loga. Ok Trainer was he een Jahr bi Amisia Wolthusen. Dann gung he na RSV Emden. Dor is he Huusmester van de Vereenshuus. Ik treff hum dor of un toe, wenn ik dor Spöl. He is 'n fein, ruhiger Fent. In Sömmer 2012 gaff he sien offizielles Ofskeedsspöl, wor ok Heinrich un Ukrow un noch 'n Bült anner bekannte Spöler kwammen. Nu kunn man in 't Bladd lesen, dat he noch maal in Wybelsum uplopen will. De stahn in de A-Kreisklasse an lesd Stee – und Jörg Müller sall helpen, de Ofstieg toe vermieden. Bün gespannt, of dat klappt.

Noch eens: Güstern hett Bayern München mit Tor dör Pizarro in de Naspöltied tegen de VFB Stuttgart mit 2:1 wunnen. Mit hett dat as Werder-Bremen-Fan düchteg sehr daan. De Bayernfans mögen mi vergeven.

So nu noch as alltied 'n Foetballsprök van Prominente, dit Maal van Werner Hansch.

Ja, Statistiken. Aber weffe Statistik stimmt noch? Na de Statistik is jede 4. Minsk een Chines, aber hier spölt gaar keen Chinese.

Och, dat harr `k bold vergeten toe fragen: Wennehr word dat Fan-Forum van Kickers Emden weer up Stee brocht? Man kummt neet rin.

So, leev Toehörers van Radio Oostfreesland,  
ik hoop, Joe hett dat Plattdüütsk gefallen, denn mien Motto heet ja alltied,  
plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.

.